




Ayera e onderstation di Elmar na Palm Beach a wordo inaugura pa Diputado Frank Croes, den presencia di funcionarionan di Elmar, manera Director Ir. Bok, y otro invitadonan. Despues a sigui un encuentro den Dutch Master Room di Aruba Palm Beach. E station ta haci posible pa den futuro tin coriente disponible pa otro proyectonan cu lo aparece na e centro hotelero di Aruba.

VERDAD, NUNCA A PUE
 BUELA NINGUN HEDER
 NINGUN CAUSA NI NUN
 GUN NACION

DIARIO

DI ARUBA

Bo Matutino
Setamente Arubiano

DIASABRA 22 JUNI 1985 AÑA 4, No 1350

BETICO CROES TA REGRESA OTRO SIMAN

ORANJESTAD(AAN)—Mientras ya señores Nisbet y Mito Croes a regresa, ainda Betico Croes no a bolbe di Hulanda.

Segun informenan ricibi, señor Betico Croes ta sosteniendo conversacionnan cu politiconan Hulandes y ta wordo spera otro siman na Aruba.

CONVOCACION CONFERENCIA DI PRENSA TA WORDO INVESTIGA


ORANJESTAD(AAN)—Kende ta e persona cu a convoca un conferencia di prensa pa Diputado van der Kuyp? Den tur e problemanan cu Aruba ta confrontando, awor mester bay averigua, kende tabata e persona, cu sin ningun autoridad, pero si cu hopi tempo libre, a dicidi di yama medianan di comunicacion y solicita nan presencia pa un conferencia di prensa, cu mester a wordo convoca pa Diputado van der Kuyp.

E promer señalnan cu algo no tabata cuadra, a bira visto, na momento cu medianan di comunicacion a presenta na e direccion indica pa un persona cu a yama mas tempran pa bisa cu Diputado van der Kuyp lo bay dicta un conferencia di prensa. Na cierto momento, accidentalmente Diputado van der Kuyp a mira e periodistanan presente y a puntra kico tabata pasando y asina a wordo informa cu el a convoca un conferencia di prensa. E diputado a dicidi di papia en todo caso cu e periodistanan y e resultado di e encuentro di antayera a keda publica ayera.

Pero mientras tabata reina sospecha caba cu un hende a dicidi di perde su tempo cu weganan di infancia, e asunto a haya un rabo, ora a bira conoci ayera cu un persona a yama un restaurant tambe y a ordena pa un cantidad di cuminda wordo hiba na residencia di Diputado van der Kuyp pa un conferencia di prensa. E cuminda mester a regresa sin mas pa e restaurant, comoquiera cu e diputado no a pidi ningun cuminda. E asunto awor ta den via di investigacion y lo mester bay determina kende ta esun, cu talbez pa falta di algo di haci, a dirigi e wegá.



Ayera AVP a dicta un conferencia di prensa, na cual ocasion exponentenan di e partido a duna puntonan di vista encuanto e ultimo desaroyonan. Tabata presente tambe Mr. Mito Croes, kende a regresa di Hulanda caminda el a forma parti di e delegacion, y hunto cu señores Watty Vos y Henny Eman el a presenta relatonan na prensa manera publica den edicion di awe.



E reconstruccion di Maggy NV den Nassastraat ta andando y ayera por a bebe spantenbier comoquiera cu e punto mas alto a wordo alcanza. Reconstruyendo e edificio, cu lo ta dos bez mas grandi cu esun anterior, e compania ta demostra confianza den futuro di Aruba, manera a wordo expresa. E empresa ta spera di por habri su portanan pa publico na luna di September. E inversion total lo ta alrededor di 2 Millon y mey florin.

Mientras ningun informe oficial a wordo duna MAYORIA DEN CUERPO POLICIAL LO A BOLBE PIDI TRASLADO

ORANJESTAD(AAN)—Te cu ayertardi 5 or miembronan di Cuerpo Policial di Aruba por a presenta peticionnan pa traslado pa otro isla.

Mientras Cuerpo Policial tabata parece hermeticamente cera pa cualquier informe, DIARIO for di ayertardi, promer cu e ultimo hora a bati, tabata tin indicacion fuerte cu atrobe mas di 50 porciento di miembronan di Cuerpo Policial a solicita traslado.

Dialuna e Comision institui pa Gobierno Central lo mester reuni y sin duda lo por haya un mejor vista, aunque tur indicacion a base di investigacion propio di DIARIO ta, cu un cantidad grandi pidi traslado y cu e numero ta inclui tambe Arubianonan.